

*Maurits Malmberg di Comision
Hoben y Talentoso;*

Pa di tres aña consecutivo lo organisa e proyecto “Hoben y Talentoso”



Dos aña pasa a cuminsa cu e proyecto ‘Hoben y Talentoso’. Cu e proyecto aki ta traha pa stimula hobennan riba e trayectoria di nan bida pa bira adultonan responsabel.

E exito di un persona no ta contribui unicamente na satisfaccion y bienestar di e persona mes y esunnan rond di dje, pero e ta contribui tambe na e espiritu positivo y logronan di un pais completo. Sea ta den e rol di mayor, maestro di scol, como parti di e forsa laboral, como empresario of trabou boluntario.

Presidente di e Comision Hoben y Talentoso Sr. Maurits Malmberg a conta cu den e prome aña di e proyecto a traha un asina yama “weekly planner” pa tur alumno di scol secundario na Aruba.

Pa e edicion di aña pasa a crea un “Award Book” cu ta reconoce y ilustra e asina yama ‘Role Models’ aki pa nan por inspira tur otro ho-

ben di nos pais y sinti nan influencia positivo. Un influencia cu nan mes tambe a uza pa bay dilanti den bida y logra metanan grandi.

Mester bisa cu e aña aki lo reconoce 28 hoben cu a destaca den diferente area manera deporte, arte, musica, baile, sector empresarial, innovacion y educacion.

Cu e ‘Award Book’ ta spera cu esaki por yuda hobennan stimula nan exigencianan ora nan ta para dilanti retonan cu bida ta trece cun’e. Esaki uzando nan talentonan pa gara e mundo cu dos man pa logra surpasa cualkier dificultad den bida. Otronan a bay nan dilanti y a logra.

Comision Hoben y Talentoso ta contento di por reconoce nos propio talentonan local cu a lo largo ta e heroenan cu nos muchanan y comunidad completo ta admira. Como ehempel por pensa riba hobennan cu na un edad relativamente hoben a logra metanan grandi.

Ehempel ta Xander Bogearts den Boston Red Sox of Sarah Quita Offringa cu a logra bira ocho bes campeon mundial den surfing. E dos hobennan aki a ricibi e premio di Hoben y Talentoso di 2013.

E proyecto Hoben y Talentoso 2015 ta clausura cu entrega di e Award Book Hoben y Talentoso 2015 dia 4 di November den un evento red carpet na Cas di Cultura. □